

# UKM FC perlu kerja keras

FOTO: BERNAMA

Pengendali UKM FC, Sulaiman Husin menyifatkan keadaan cuaca dan padang becak ekor hujan sepanjang perlawanan menjadi antara punca anak buahnya gagal dalam meraih kemenangan apabila sekadar meraih keputusan seri 2-2 ketika turun melayan kunjungan Terengganu FC II (TFC II) pada aksi final pertama Piala Cabaran di Stadium Shah Alam, kelmarin.

Begitupun, dia tetap berpuas hati dengan aksi dipamerkan anak buahnya dan mengakui beraksi di gelanggang sendiri bukan lagi menjadi faktor kelebihan buat mereka dalam memburu kejayaan.

"Walaupun ketinggalan pemain bangkit untuk mencari jaringan penyamaan dan mereka berjaya berada di depan pada satu ketika, namun disebabkan sedikit kelekakan kita dihukum dengan keputusan seri ini.

"Bagaimanapun peluang buat kami untuk merebut gelaran juara edisi pertama Piala Cabaran ini masih terbuka walaupun pelawat (TFC II) memiliki kelebihan dua gol di tempat lawan," ka-

tanya ketika ditemui sejeurus tamat perlawanan, kelmarin.

Mengulas lanjut, Sulaiman mengakui mereka perlu bekerja keras ketika bertandang ke Kuala Terengganu dan mengharapkan pemain dapat memanfaatkan setiap peluang yang ada untuk meraih kejayaan pada aksi kedua Isnin depan.

"Apa pun saya harap dua tonggak import pasukan, Redouane Zerzouri dan Nam Se-in kembali cergas menjelang pertemuan kedua nanti sekaligus memperkemas semula jentera tengah pasukan.

"Begitupun sekiranya sebaliknya, saya yakin pemain-pemain tempatan yang kita ada ketika ini mampu mengisi kekosongan itu sebagaimana yang dibuktikan pada perlawanan ini," katanya.

Dalam pada itu, Sulaiman enggan memberi tekanan kepada pemainnya sebaliknya menyifatkan kejayaan mara ke pentas final Piala Cabaran sudah memberi satu pencapaian cukup besar buat UKM FC sepanjang mengharungi kancah Liga Malaysia musim ini.



Ayam tambatan UKM FC, Michael Chukwubunna Ijezie meralkan jaringan gol penyamaan pada minit ke-35 ketika bertemu TFC II dalam aksi peringkat akhir pertama Piala Cabaran Stadium Shah Alam, kelmarin.